

DE SA PRIMU STATZIONI- ***Gesus est cundannau a morti.***

De s'Evangeliu in su contu de Luca:

« Gesus, cumentu fadiat sempri, fiat andau a su monti de is olias. Is scientis puru dd'iant sighiu . Arribau a su logu, ddi s'iat nau: "pregai, po no intrai in tentatzioni". Apustis si ndi fiat stesiau e ingenugau pregat: "Babu miu, si bolis stesiamindi custu calixi. Puru cun totu, no siat fata sa voluntadi mia, ma sa tua ". Insandus, un'angelu de su celu ddi fiat apariu po ddu consolai. Pigau de su disisperu pregat prus a forti. E su sudori si fiat fatu cumentu e stidius de sanguini, chi arruiant a terra .

Arribau a su espuru de sa Pasca, Gesus est faci a pari a su Babu. S'ora annunziata est benia tot'a una borta timia. E de custa timoria no s'at cuau nudda. E propriu candu fiat pigau totu de cussu disisperu, Gesus si ponit totu in manus de su Babu. Po unu momentu duas voluntadis s'affrontant. Apustis, totu in una borta, s'abandonat a s'amori, chi issu e totu iat predicau. Su mundu depit sciri ca deu fatzu cussu chi su Babu m'at cumandau.

Gesus, fradi nostu, po aberri a totu is ominis sa bia de sa Pasca, at bofiu sperimentai sa tentatzioni e sa timoria. Impara a nosu a si rifugiai aundi ses Tui, a ripiti is fueddus tus de abandonu a sa voluntadi de Deus. Fai chi su mundu connoscat su poderi de s'amori tu chentza treminis.

SA DE DUAS STATZIONIS- ***Gesus est carriau de sa gruxi.***

De s'Evangeliu in su contu de Luca:

In s'interis chi Gesus fiat chistionendi, arribat una truba de genti . Innantis de totus ddui fiat cussu chi si tzerriat Giuda, unu de is doxi. Si fiat acostau a Gesus po ddu basai. Gesus dd'iat nau: «Giuda cun d'unu basidu traixis su fillu de s'omini » .

Sa superbia nosta s'est arrennegada innanti a s'umilesa de Gesus. Sa corrutzioni nosta s'est risentia innantis a sa limpiesa lucenti de Deus. E aici nosu seus benius a essi sa gruxi de Deus. Nosu, trevessus chentza de sentidu. Nosu, cun is pecaus nostus chentza de sensu. Nosu eus prantau sa gruxi de sa tristura nosta, de su castigu nostu. Ma Deus pigat asuba sua sa gruxi; sa gruxi nosta. Cun su poderi de s'amori suu Deus si sfidat. Deus pigat sa gruxi. Est unu misteriu de bundadi chi no cumprendeus fintzas a fundu, chi si fait tenni bregungia de sighiri a essi barrosus.

Signori Gesus, Tui ses intrau in sa storia de s'umanidadi agatendidda arrevera a Tui e furriada a Deus. Curamiddu cun sa passientzia Tua sanamì cun s'umilidadi tua.

SA DE TRES STATZIONIS- ***Gesus arruit po sa primu borta.***

De su liburu de su Profeta Isaia :

“E puru Issu s’est carriau de is tribulias nostas. S’est acollau is doloris nostus. E nosu dd’istis giudicau castigau, atripau de Deus e umiliau.

Issu est steti crucifissu po is pecaus nostus, po is malafatus nostus.

Su castigu chi si donat su salvamentu s’est furriau asuba de Issu. Po is liagas suas nosu seus steti sanus.

Segundu su pentzamentu de is ominis Deus no podit arrui. Invecias arruit. Poita ? No podit essi custu unu sinnali de debilesa, ma feti unu sinnali de amori po nosu . Arruendi asuta de su pesu de sa gruxi, Gesus s’arregodat ca su pecau pesat , su pecau abasciat e sperdit, su pecau castigat e fait mali. Ma Deus si bolit beni e bolit su beni nostu . S’amori ddu spingit a tzerriai a nosu surdus chi no boleus intendi: “ Besseindi de su pecau , poita si ndi pigat sa paxi .

Signori Gesus eus perdiu su sensu de su pecau. Oi nci est in giru una boxi frassa e traitora de su mali, chi ponit a su primu postu su fitziu, su coru malu e is birighitzus, presentendiddus cumentis conchista de libertadi. Signori Gesus aberri is ogus nostus, po chi nosu s’acateus de su ludu chi nc’est.

SA DE CUATRU STATZIONIS- ***Gesus atobiat sa mama sua.***

De s’Evangeliu in su contu de Luca :

Simeoni ddus iat benediscius e a Maria, mama sua, dd’iat nau: Issu est innoi po sa distrutzioni e sa resuretzioni de medas in Israeli. Sinnu de contrariedadi, poita aici ant a essi scoviaus is pentzamentus de corus medas.

E a tui puru una spada t’at passai s’anima de parti in parti .

Onnia mama est sprigu de s’amori, est aposentu de ternura, est fideli e sigura.

Poita una mama vera bolit beni mancai no siat bofia beni. Maria est sa mama. In Maria s’amori no est imbrutau de su malucoru chi impresonat su coru. Maria est sa mama. Su coru suu est sempri acanta a su coru de su fillu. Sunfrit e portat sa gruxi. Est sa mama e sighit a essi mama, po nosu, po totu.

Signori, teneus totus abisongiu de sa mama. Teneus abisongiu de amori chi siat verdaderu e fideli. Teneus abisongiu de amori chi no andit stontona stontona, unu amori chi siat riparu siguru in s’ora de su abisongiu, de sa timoria, de su dolori. Signori Gesus, teneus abisongiu de feminas, de sposas, de mamas , chi torrint a donai a is ominis sa faci pulia de s’umanidadi. Signori Gesus, teneus abisongiu de Maria, sa sposa, sa mama chi no sbisuriat mai s’amori. Signori Gesus, ti pregaus po totu is feminas de su mundu.

SA DE CINCU STATZIONIS- ***Gesus est agiudau a portai sa gruxi.***

De s'Evangeliu in su contu de Matteo :

In s'interis chi fiant bessendinci, iant atobiau un'omini de Cirene, chi si tzerriat Simone e dd'iant obrigau a portai sa gruxi de Issu.

Unu poburu disconnotu messaju, de su cali no chistionant is liburus de storia. Puru cun totu fait sa storia. As scritu unu de is contus prus bellus de sa storia de s'umanidadi. Tui portas sa gruxi de un'atru. Tui nd'atzias sa gruxi e no permitis chi strechit su cundennau.

Tui donas dignidadi a onniunu de nosu ,arregodendisì ca nosu seus propriu nosu feti candu no pentzaus a nosu e totu.Tui s'arregodas ca Gesus s'abetat in sa bia,me in is domus,me in is spidalis,in dogna logu. Gesu Cristu s'abetat.Deus a riconnosci?Deus agiudai?O eus a morri in su malucoru nostu?

Signori Gesus,est studendisindi s'amori e su mundu est diventendi fridu onniunu est po contu suu. Signori sega is cadenas chi no si lassant curri po agiudai is atrus. Agiudasì a torrai agatai a nosu e totu. Signori Gesus torra a allui in nosu sa cincidda de custa umanidadi chi Deus s'at postu in su coru a s'incarreru de sa creatzioni. Scabullisindi de su pecau. Aici eus a torrai agatai su prexeri de torrai a bivi in paxi cun Gesus.

SA DE SESI STATZIONIS ***Sa Veronica asciugat sa faci de Gesus.***

De su liburu de su Profeta Isaia:

No tenit aparentzia e nimancu bellesa po atrai sa castiada nosta. Dispretzau e arrefudau de is ominis. Omini de su dolori chi connoscit beni su patimentu.

De su liburu de is salmus:

Cumentu su screbu currit a su currentinu, aici s'anima mia currit innui ses Tui, o Deus. S'anima mia tenit sidi de Deus,de su Deus chi donat vida. Candu apu a benni e apu a biri sa faci de Deus?

Sa faci de Gesus est sciusta de sudori e de sanguni,est coberta de spudus sfacius. Chini at a tenni su coru de si ddu acostai? Una femina. Una femina bessit a sa scrobeta e tenit alluta sa lantia de s'umanidadi. Asciugat sa faci e agatat sa faci. Canta genti oi est chentza de faci? Cantu genti oi bivit in su disterru de s'abandonu e de s'indiferentzia. Est biu feti cussu chi abruvat de amori e s'incrubat asuba de Gesu Cristu chi sunfrit.

Signori Gesus,at a bastai unu passu e su mundu at a podi cambiai. At a bastai unu passu e in famiglia at a torrai sa paxi. At a bastai unu passu e cussus chi pedint sa limusina no ant a essi prus solus. At a bastai unu passu e su malaidu at a intendi una manu chi ddi stringit sa manu, po sanai totu is duas. Signori Gesus, at a bastai unu passu. Agiudasì a ddu fai.

SA DE SETI STATZIONIS- ***Gesus arruit sa de duas bortas.***

De su liburu de su profeta Geremia:

Tui ses tropu giustu, Signori, po chi deo potza arrexonai cun Tui. Ma iat boli feti pregontai a tui una cosa asuba de sa giustitzia: poita sa genti mala bivint beni ? Poita totu is traitoris bivint assellius ?

De su liburu de is salmus:

No ti inchietist cun sa genti mala. No siast fengiosu cun is malafatoris.

Cumentis fenu chitzi s'ant a sicai. Ant a arrui cumentis ebra in su cungiau. Feti unu pogheddu e sa genti mala at a sparesse.

Su bonu, a su contrariu, at a tenni in poderi sa terra at a gosai de paxi manna.

Sa barrosia nosta, is trevessuras nostas pesant asuba de su corpus de Gesus Cristu. Pesant. E Gesu Cristu arruit oi puru po si ndi liberai de su pesu grai de is peccas. Ma ita est oi chi ferit de prus su corpus santu de Gesus?

De siguru est passioni dolorosa de Gesus s'fracadura contras sa familia

Parit chi oi ci siat unu banteria intranniada de s'aremigu chi pentzat de ndi bogai de mesu sa familia. S'omini at a bolli torrai a inventai s'umanidadi, cambiendi is arrexinis e totu de sa vida, cumentis Deus dd'at pentzada e bofia. Ma, a si ponni a su postu de Deus, chentza de essi Deus, est machiori arriscau. S'arrutroxa de Gesu Cristu s'abrexat is ogus e si fatzat biri sa faci bella e santa de sa familia, de sa cali teneus totus abisongiu .

Signori Gesus, sa familia est unu bisu de Deus arregalau a s'umanidadi.

Sa familia est su bratzolu innui seus nascius e innui dogna di torraus a nasci in s'amori. Signori Gesus, intra me is domus, intona su cantidu de sa vida, torra allui sa lantia de s'amori, faisì intendi sa bellesa de essi unius is unus cun is atrus in d'unu abratzidu de vida; vida sustenta de su sulidu e totu de Deus. Su sulidu de Deus amori. Signori salva sa familia.

SA DE OTU STATZIONIS- ***Gesus atobiat is fèminas de Gerusalemi.***

De s'Evangeliu in su contu de Luca:

«Ddu sighiat una folla manna de genti e de fèminas,chi si batiant su petus e si lastimant asuba de Issu. E Gesus furriendi sa faci ddi si narat:“Fillas de Gerusalemi,no prangiais po mei,ma prangei po bosatrus e totu e po is fillus de bosatrus. Ant a benni dis chi s'at a nai:“ Biadas is fèminas chi no ant generau ,poita chi tratant aici sa linna frisca,ita nd'at a essi de sa linna sicada.

Su prantu de is feminas de Gerusalemi est un'unda de piedadi in su caminu de su cundennau.Ma su prantu de is mamas de Gerusalemi est unu piticu stiddu de su frumini de lagrimas caladas de is ogus de is mamas. Mamas de cundennaus,de terroristas, ma sempri mamas.Ma su prantu no bastat. Su prantu si debit furriai in amori,in fortilesa,po costruiri unu mundu prus bonu.Su prantu depit fai manera chi no nci siant atrus prantus.

Signori Gesus, Tui connoscis su prantu de is mamas. Tui bisi in dogna domu su currongoni de su dolori. Tui intendis su tzunchiu mudu de medas mamas ferias de is fillus,ferias fintzas a morri,ma abarrendi bias. Faisi intendi sempri fillus, po donai a is mamas sa fieresa de s'ai generau e su prexu de podi benedixi sa di chi seus nascius. Signori, strexi is lambrigas de is mamas e s'arrisu at a torrai in totu is domus .

SA DE NOI STATZIONIS- ***Gesus arruit sa de tres bortas .***

De su liburu de su Profeta Abacuc:

No ses Tui Signori,fintzas de su cumentzu,su Deus miu?

Tui chi portas ogus aici sintzillus de no podi biri su mali,de no podi castiai is malafatus.

Poita,birendi is malus intranniaus, abarras citiu? Scri su chi bisi e sculpiddu in tauledda in modu chi si potza ligiri beni. Est una bisura chi atestat su tremini e no narat fraulas .

Pascal cun meda cumprendoriu at nau: Gesus at a essi in agonia fintzas a sa fini de su mundu. Ma innui Gesus agonizat in custu tempu? Su mundu est pratziu in tzonas de arricchesa e tzonas de poboresa:custa est s'agonia de Gesus oi. Su mundu,si podit nai,est fatu de dus aposentus:in unu aposentu si spercada e in s'atru si crepada.

Poita no cumpredeus ca is poburus funt sa cura po fai sanai is arricus?

Poita? Poita seus aici zurpus ?

Signori Gesus,s'omini chi bivit po amuntonai Tui dd'as tzerriau pagu sabiu .

Poita chini pentzat de possidi cancuna cosa est pagu sabiu. Unu sceti est su meri de su mundu.

Signori,su mundu est cosa tua e Tui dd'as donau a totus, po chi totus bivant. Amuntonai richesa est a furai, poita no permitit a medas de bivi.

Signori fai fini custa bregungia chi dividit su mundu in palatzius e barracas.

SA DE DEXI STATZIONIS- ***Is sordaus si pratzint is bistiris de Gesus.***

De S'Evangeliiu in su contu de Santu Giuanni:

Is sordaus, apustis chi iant crucifissau a Gesus, nd'iant pigau is bistimentas e ndi iant fatu patru partis, una po dogna sordau e su bistiri. Ma cussu bistiri fiat chentza de cosiduras, tessiu totu in unu arrogu. Po cussu iant nau tra issus :

“No ddu segheus, ma si ddu giogaus a chini at a tocai “. Aici si cumpriat sa scrittura .

Is sordaus pigant a Gesus is bistiris cun sa violentzia de is ladronis . Tentant puru de ndi ddi furai su pudori e sa dignidadi. Ma Gesus est su pudori. Gesus est sa dignidadi. Su corpus umiliau de Gesus bessit cumentu acusa po totu is umiliatzionis de su corpus creau de Deus. Ma oi su corpus est meda bortas bendiu e comporau .

Candu eus a cumprendi ca su corpus chentza de puresa no podit generai sa vida ?

Signori, de puresa no si ndi chistionat prus. S'est spaniau su cumbincimentu, fraulanciu in totu, chi sa puresa siat nimiga de s'amori. Est berus su contrariu. Sa puresa est sa conditzioni pretzisa po podi amai chentza de traitoria.

Feti chi est puru podit amai. Signori Gesus, donasi corus sintzillus e aici at a torrai a nasci in su mundu s'amori.

SA DE UNDIXI STATZIONIS- ***Gesus est crucifissau***

De s'Evangeliiu in su contu de Matteo:

Impari cun Issu fiant steti crucifissaus dus ladronis. Cussus chi passant inguni dd'ofendiant narendi: “Tui chi ndi sciuscias su tempiu e ddu torras a fai in tres dis, salva a tui e totu. Si Tui ses su fillu de Deus, calandi de sa gruxi .

Is predis maioris, cun is dotoris de sa lei e is mannos, ddu stociant: “at salvau is atrus e no podit salvai a issu e totu . Su rei de Israeli ndi calit de sa gruxi e dd'eus a crei” .

Cussas manus chi ant benedixiu a totus , imoi funt atacitadas a sa gruxi. Cussus peis chi ant caminau meda po seminau amori, imoi funt apicigaus a su patibulu. Poita Signori no ndi ses calau de sa gruxi, arrespundendi a is intzulidus cosa nosta? No ndi ses calau de sa gruxi poita aici iat essi steta cunsagrada sa prepotentzia cumentu sennora de su mundu. Ma est s'amori sa sola forza chi podit cambiai su mundu. Poita, o Signori, custu pretziu aici mannu? Po si nai ca Deus est amori estremu e poderosu .

Gesus crucifissau, totus si podint donai delusionis. Feti Tui no s'as a deludi mai. Tui as permitiu chi is manus nostas t'essint incravau a sa gruxi, feti po si nai ca s'amori tu, est sintzillu, firmu e no torrat agoa. Gesus crucifissau, is ogus nostus binti is manus tuas incravadas. Cun totu custu, point sempri donai sa libertadi vera. Gesus crucifissau, est spaciada s'illusioni chi si potzat bivi beni chentza de Deus. Gesus crucifissau, teni piedadi de nosu peccadoris .

SA DE DOXI STATZIONIS- ***Gesus morit in sa gruxi .***

De s'Evangeliu in su contu de Santu Giuanni:

Gesus apustis bia sa mama sua e innè acanta su scienti chi Issu stimat, iat nau a sa mama: "Ecu fillu tu". Apustis iat nau a su scienti: "Ecu a mama tua". E de cussu momentu su scienti dd' iat pigada in domu sua.

De mezu d'is fintzas a is tres de meri si fiat fatu scuriu in totu sa terra.

Faci a ora de is tres Gesus iat tzerriau a boxi manna: "Deu miu, Deu miu, poita m'as abandonau? E Gesus cun d'unu tzerriu mannu fiat spirau.

S'omini at pentzau cun pagu sentidu: Deus est mortu. Ma si Deus morit, chini s'at a torrai a donai sa vida? Si morit Deus ita est sa vida? Sa vida est amori. Ma insandus, sa gruxi no est sa morti de Deus. De sa gruxi nascit sa vida noa de Saulo, de Santu Austinu, de Santu Franciscu, de Mama Teresa de Calcata e de Giunni Paulu segundu. De sa gruxi nascit sa rivoltzioni de s'amori. Po custu motivu sa gruxi no est sa morti de Deus, ma est su nascentu de s'amori cosa sua in su mundu. Benedita siat sa gruxi de Gesu Cristu .

Signori Gesus, in su silentziu de custu meri s'intendit sa boxi tua: "Tengiu sidi tengiu sidi de s'amori cosa tua. In su silentziu de custu meri s'intendit sa pregadoria tua: "Babu perdonaidus ". In su silentziu de su coru s'intendit su carinniu de s'urtimu arregalu cosa tua: <<Ecu sa Mama tua sa Mama mia>>. Gratzias o Gesus, poita as afidau a Maria sa missioni de s'arregodai dogna di ca su sentidu de totu is cosas est s'Amori. S'amori de Deus prantau in su mundu cumentu una gruxi. Gratzias o Gesus .

SA DE TREXI STATZIONIS- ***Gesus scravau de sa gruxi .***

De s'Evangeliu in su contu de Matteo:

«Calau su meri, fiat beniu un'omini arricu de Arimatea, chi si narat Giuseppe, su cali si fiat fatu issu puru scienti de Gesus. Fiat andau innu fiat Pilatu e dd'iat domandau su corpus de Gesus. Insandus Pilatu iat ordinau chi si dd'essint cunsinniau.

Sa malafatia est cumpria. Nosu eus bociu a Gesus e is liagas suas abruyant in su coru de Maria. Unu dolori feti imprassat sa Mama cun su Fillu: sa piedadi . Eia, sa piedadi tzerriat, comovit e ferit cussus puru chi faint de solitu feridas. Sa piedadi. A nosu si parit de tenni cumpassioni de Deus. Ma est Deus chi tenit cumpassioni de nosu. Su dolori no est prus disisperau e no ddu at a essi mai prus, poita Deus est beniu a sunfriri cun nosu. E cun Deus si podit essi disisperaus?

O Maria, in cussu fillu tui imprassas dogna fillu e intendis su dolu de totu is mamas de su mundu. O Maria, is lagrimas tuas passant de seculu in seculu e prangint su prantu de totus.

O Maria, tui connoscis su dolori, ma creis. Creis chi is nuis no ndi potzant studai su soli. Creis chi sa noti preparit s'obrescidroxu. O Maria, tui chi as cantau su Magnificat, intonasi unu cantidu chi benit de su dolori cumentu unu partu, de su cali nascit sa vida.

O Maria, prega po nosu .

SA DE CATODIXI STATZIONIS- *Gesus est postu in sa tumba .*

De s'Evangeliu in su contu de Matteo:

Giuseppi, pigau su corpus de Gesus, dd'iat trogau in d'unu lenzoru biancu e dd'iat postu in sa tumba sua noa, scavada in s'arroca. Arrumbulada apustis una perda manna in sa uca de sa tumba, si ndi fiant andaus. Fiant ingui ananti de su sepulcru Maria de Magdala e s'atra Maria.

De su liburu de is Salmus :

Su coru miu est prexau, poita no as a abandonai sa vida mia in su sepulcru e no as a lassai chi su santu cosa tua biat sa corrupidura .

Cancuna borta sa vida assimilada a unu Sabudu Santu longu. Totu parit acabau. Parit chi triunfit su malu intranniau. Parit chi su mali siat prus forti de su beni. Ma sa fedi si fai biri atesu, si fait biri sa luxi de una d'ì noa. Sa fedi s'assigurat ca s'urtimu fueddu spetat a Deus, feti a Deus. Sa fedi est deaderus una pitica lantia. Ma est s'urtima lantia chi donat luxi a sa noti de su mundu. E custa pitichedda luxi s'amesturat cun is primas luxis de sa d'ì.

Sa d'ì de Gesus risuscitau. Sa storia insandus no acabat in sa tumba, ma incarrerat in sa tumba. Aici at promitiu Gesus; aici at a essi.

Signori Gesus, su Cenabara Santa est sa d'ì de su scorù, est sa d'ì de sa t'irria chentza de arrexoni. Ma su Cenabara Santa no est s'urtimu fueddu. S'urtimu fueddu est sa Pasca, chi fait binci sa vida, chi fait binci su beni asuba de su mali.

Signori Gesus, su Sabudu Santu est sa d'ì de sa timoria, sa d'ì in sa cali parit totu finiu. Ma su Sabudu Santu no est s'urtima d'ì. S'urtima d'ì est sa Pasca, sa luxi chi si torrat allui, s'amori chi bincit s'odiu . Signori Gesus, donasì sa fidi firma de Maria po crei in sa beridadi de sa Pasca.

AICI SIAT .